


TEZAU LITURGIC

2 MAI

SLUJBA SF. CUVIOS VASILE KADOMSKI DE LA RIAZAN



**MINEIUL PE MAI
MOSCOVA**



Месяца мая во 2-й день

Блаженнаго Василия

Кадомскаго

На велицей вечерни

На Господи, воззвах: стихиры, глас 5:

Миру чужд быв,/ сущих в мире не чуждался
еси,/ юродив наречен,/ мудрости наставлял
еси,/ страдания терпѣя,/ страждущих исцелял
еси,/ темже в житии твоём привременнем/
милость Божию улучил еси,/ блаженне Василие.

Образ терпения и незлобия являя,/ многострадальному Иову подражал еси,/ сердце в жилище Духу Святому уготовляя,/ по вся дни и ночи в молитве пребывал еси,/ странствию Христову ревнуя,/ Царствия Божия достиг еси,/ блаженне Василие.

Возлюбив усердно Господа/ и трудолюбне подвижасься,/ Божественною благодатию

просветился еси/ и дары Духа Святаго стяжал
еси./ Темже, дерзновение твое к Богу ведуще,/ к
тебе с молитвою притекаем,/ блаженне Василие.

Слава, глас 6:

О, блаженне Василие,/ града Рязани
похвало,/ мира чуждаяся,/ смирен, целомудр,
праведен/ и заповедей Божественных хранитель
явился еси,/ молися за ны ко Господу,/ да
спасет души наша.

И ныне, Богородичен, глас тойже: Кто Тебе не
ублажит, Пресвятая Дево:

Вход. Прокимен дне. И чтения три
преподобническая.

На литии стихира храма и святаго, глас 3:

Блаженне Василие чудне,/ человеке Божий,/
яко юрод, на земли пожил еси/ и, яко злато в
горниле, душу свою очистил еси./ Грехов
прощение нам испроси/ и недугов избавление,/
да Царствия Небеснаго сподобимся.

Слава, глас 2:

Все упование на Бога возложив,/ пучину
жития земнаго преплыл еси/ и, брега Горняго
Отечества достигнув,/ со ангелы на Небесех
ныне радостне ликуеши,/ угодниче Христов
Василие./ Темже помози нам, на земли
живущим,/ печали горькия избавитися.

И ныне, глас тойже: О, чудесе новаго, всех
древних чудес:

На стиховне стихиры, глас 8:

Ангельски пожив, святе,/ подвиги на всяк
день подъял еси,/ молитву, яко щит,
воздержание, яко лук,/ и смирение, яко шлем,
имея,/ темже верныя люди назидал еси/
заповеди Божия усердно исполняти/ и страх
Божий имети./ Помози и нам, блаженне
Василие,/ веру добре соблюсти/ и Царствия
Небеснаго достигнути.

Стих: Господь хранит пришельцы,/ сира и вдову примет.

Мира красоту и всяческая, яже в мире, оставив,/ Единому Христу последовал еси/ и сетей вражиих избежал еси,/ премудре Василие,/ ныне же, на Небесех с лики святых Престолу славы предстоя,/ молися грехов прощение нам даровати/ и Царствия Небеснаго достигнути.

Стих: Господь возводит низверженные,/ Господь любит праведники.

Безумен в мире наречен,/ жителей града Рязани мудрости Христовой наставлял еси,/ нищету духовную стяжав,/ милостыню бедным щедро раздавал еси,/ скорби же и нужды претерпевая,/ в печали сущих утешал еси./ Помози и нам, святче Божий,/ крест жития земнаго безропотне понести/ и Царствия Небеснаго достигнути.

Слава, глас 7:

Лик святых земли Рязанския житием
праведным украсив,/ новый предстатель о
Отечестве нашем явился еси,/ угодниче Христов
Василие,/ темже ныне со святителем Василием и
новомученики Церкви нашей/ предстательствуй
о всех нас,/ любовью тя почитающих.

И ныне, глас тойже:

Под кров Твой, Владычице, вси
земнороднии, прибегающе, вопием Ти:/
Богородице, упование наше,/ избави ны от
безмерных прегрешений/ и спаси души наша.

Тропарь, глас 4:

Молитва усердная пища и питье тебе бысть,/
блаженне Василие,/ в несении креста жития
странническаго/ любовь Христову познал еси./
Оком чистым будущая, яко настоящая,
прозревая,/ радость и от бед избавление
требующим твоея помощи даровал еси./ Темже

и нас, яко Божий избранник,/ не забуди твоими ходатайствами,/ Христа Бога о нас умоляя.

На утрени

По 1-м стихословии седален, глас 1:

Безумием мнимым безумие мира обличив, блаженне Василие, образ терпения и незлобия явил еси. Мы же, предстательство твое к Богу введуще, просим тя: молися за ны ко Господу, да спасет души наша.

Слава, и ныне, Богородичен, глас тойже:

Владычице Пречистая, архангельский глас приносим Ти: радуйся, Благодатная, Господь с Тобою.

По 2-м стихословии седален, глас 2:

Дадесе ти благодать от Бога, блаженне Василие, пещися о людех, недужныя целити и скорбныя утешати. Темже мы, ныне память

твою совершающе, тепле зовем: помяни и нас в твоих святых молитвах.

Слава, и ныне, Богородичен, глас тойже:

Печали отложше, возведем очи наша горе, да узрим в Небесех Царицу Богородицу, покровом Своим светоносным нас покрывающую.

Величание:

Ублажаем тя,/ святой праведный Василие,/ и чтим святую память твою,/ ты бо молиши о нас/ Христа Бога нашего.

Псалом избранный: Терпя потерпех Господа, и внят ми и услыша молитву мою.

По полиелеи седален, глас 5:

Просвещен ум имея, богомудре Василие, будущая, яко настоящая зрел еси. Мы же, угодника Христова тя ведуще, от любви сердечныя взываем: не остави нас заступлением твоим, святче Божий.

Слава, и ныне, Богородичен, глас тойже:

Просвети, Чистая, души мояя очи, Свет
рождшая, да не покрывает тьма греховная мя,
окаяннаго.

Степенна, 1-й антифон 4-го гласа. Прокимен,
глас 4: Возвеселится праведник о Господе/ и
уповает на Него. Стих: Услыши, Боже, глас мой,
всегда молити ми ся к Тебе. Евангелие от Луки,
зачало 78.

По 50-м псалме стихира, глас 6:

мрачѣніе грехѡвное возненавидѣв, **святѣ**
Василие / и пламенем чистоты пламень страстей
пресѣк,/ терпѣніем и мудрейшим юродством,/
яко златыми крилами, на Небеса возлетѣл еси/ и
степенъ равноангельную достигл еси.

Канон, глас 4.

Песнь 1

Ирмос: Отверзу уста моя,/ и наполнятся
Духа,/ и слово отрыгну Царице Матери,/ и

*явлю́ся, свѣ́тло торже́ствую́, / и воспою́, ра́дуясь,
Тоя́ чуде́са.*

Царствие вечное улучшить желая, душу твою
от многомятежных страстей воистинну очистил
еси, Василие блаженне, града Рязани дивное
украшение.

Память твою пречестную почитает ныне вся
земля Рязанская, в нейже усердно подвизался
еси, преславне Василие. Темже, плоти твоя
страсти с похотями подвижнически умертвив,
богатство нетленное стяжал еси.

Всякаго мирскаго пристрастия отрекся и ум
твой к нетленным благам возвед, яже угото́ва
Господь всем любящим Его, на земли чисто
пожил еси, Василие мудре.

Богородичен: Гору святую, превышшую
Ангельских Сил, Матерь Божию и Деву
истинную по рождестве, едиными усты воспоим.

Песнь 3

Ирмос: Твоя́ песнослóвцы, Богорóдице,/ живы́й и незави́стный Исто́чнице,/ лик Себе́ совоку́пльшия духо́вно, утверди́,/ в Божéственней Твоéй сла́ве/ венце́в сла́вы сподо́би.

В молитве усердней по вся дни и нощи пребывая, блаженне, ругания и наветы терпеливне подъял еси, Христа ради, от Негоже и Вышняго причастия сподобился еси.

Юрода себе волею сотворив, богомудре, премирнаго разумения исполнился еси. Темже и Духа Святаго сосуд избранный явился еси, житием твоим страннолепным украшен.

Молитвы твоя обнощъ к Небесем возсылая, дневною же милостынею больным и страждущим благотворя, сердца их любовию согревал еси, Василие небомудренне, чадо верное Отца Небеснаго.

Богородичен: Неискусобрачная Дево, Бога
плотию рождшая, утверди мя, страстными
прилоги приклонена, несть бо разве Тебе иныя
Помощницы.

Седален, глас 5:

Плотское мудрование отринув издетска,
нищету и странство Христа ради, стяжав,
венценосец Божий на земли явился еси, Василие
блаженне. Ныне, молим тя: буди нам,
омраченным страстями землеретными, светлый
путевождь ко Христу, Солнцу правды.

Слава, и ныне, Богородичен, глас тойже:

Милосердия Твоего ради, Богородительнице
Пречистая,/ избави ны, Тя смиренно
умоляющих,/ от всех козней вражиих и
скорбных обстояний.

Песнь 4

Ирмос: Седя́й в сла́ве на Престо́ле
Божества́,/ во облаце ле́гце,/ прии́де Иису́с

*Пребожѣственный,/ нетлѣнною Дл́анию, и спасе
зову́щия:/ сла́ва, Христѣ́, си́ле Твое́й.*

Милостыню с благодарением от простецов
приемля и нищей братии ю предавая, снег и дух
бурен, мраз, и вар дневный благодушно
претерпел еси, святе, силою Божиею
укрепляемь.

Молим тя ныне, блаженне Василие, услыши
прошение наше и, помощь молитв твоих
подавая во благовремении, усмири вся брани
житейския, да, предстательство твое обретше,
прославим Милостиваго Бога.

Молим тя паки, славне Василие: юныя
вразуми путем заповедей ходити, старцы и в
немощи сущия укрепи, подвижающихся же на
дела благая направи.

Богородичен: Госпоже, Всепетая Богородице,
Мати всех Творца, помышления моя молитвами
Твоими очисти и благоплодна покажи.

Песнь 5

*Ирмос: Ужасо́шася вся́ческая/ о
Божѣ́ственней сла́ве Твое́й:/ Ты бо,
Неискусобра́чная Дѣво,/ имѣла еси́ во утробе́
над все́ми Бо́га/ и роди́ла еси́ Безле́тнаго Сы́на,/
всем воспевáющим Тя/ мир подава́ющая.*

В светлосиянный день праздника твоего,
преблаженне, услыши умиленные мольбы наша;
не лиши помощи твоея всех, почитающих
память твою в храме сем, во граде нашем и в
пределах земли Рязанския.

Исполнися воистинну Господне обетование
на тебе, чудотворче: блажени нищии духом, яко
тех есть Царствие Небесное. И ныне во славе
лучезарней Престолу всех Царя предстоиши,
понеже верный раб в час испытаний явился еси.

Усердно взываем к тебе, богоблаженне: не
остави нас, сродник твоих, яже на земли, ты бо

алчущих выну питал еси, жаждущих напаял еси, нищих же одарял еси преизобильно.

Богородичен: Воплотися неизреченно Бог из Тебе, Чистая, и, плоти соединяемъ, по Божественному существу неизменен пребысть.

Песнь 6

*Ирмос: Божѣственное сие и всечестное/
совершающе прѣзднество,/ Богомудрии,
Богоматере,/ приидите, рука́ми воспле́щим,/ от Нея́ ро́ждашагося Бо́га сла́вим.*

Вознеси, милостиве, твое моление о нас, грешных, да исправятся стопы наша к деланию заповедей Господних и да не обладает нами всякое беззаконие.

Приведи нас ко пристанищу благоотишному, посреде моря житейскаго бедствующим, Василие святе, и укажи путь верен ко Творцу всяческих, Богу нашему.

Заповеди жизни вечныя запечатлены во умех имуще, во окаменении греховнем многажды преступаем и согрешаем на всяк день умом и сердцем. Темже на помощь прииди к нам, святе Василие.

Богородичен: Воплощенное Слово Божие нашего ради спасения на земли родила еси, Дево Чистая. Тем Тя, Богородицу истинную, сердцем и усты в песнях величаем.

Кондак, глас 2:

Всякое мирское попечение волею отринув,/ чистоту же душевную юродством утаив,/ Богу и ближним усердне послужил еси,/ темже, благодати Духа Святаго исполнився,/ ангельски на земли пожил еси./ Ныне милостию твоею нас посети,/ исцеляя немощи душ и телес,/ Василие блаженне, теплый наш ходатаю.

Икос:

Теплотою Божественною согреваемъ и
благодатию, яко одеждею боготканною, оболчен,
глад, мраз и вар дневный мужественне
претерпел еси и люди верныя земли Рязанския
обильне словом напитал еси. Ныне милостию
твоею нас посети, исцеляя немощи душ и телес,
Василие блаженне, теплый наш ходатаю.

Песнь 7

*Ирмос: Не послужиша твѣри Богомудрии,
паче Создавшаго, но, огненное прещѣние
мужески поправше, радовахуся, поюще:
препетый отцев Господь и Бог благословен еси.*

Христовою любовью всем сердцем уязвився,
мудре Василие, дом твой и сродники благодушне
оставил еси. В дому же Божием на всяк день
ангельски пребывая, душою воспевал еси:
препетый отцев Господь и Бог благословен еси.

Никакоже о плоти твоей попечение имея и о славе Божией присно радея, святе Василие, на подвиги паче естества устремился еси, воспевая: препетый отцев Господь и Бог благословен еси.

Восхвалим, вернии, Василия блаженного, подвижника славного! Той бо ныне со Ангелы и лики святых в чертозах Небесных воспевает: препетый отцев Господь и Бог благословен еси.

Богородичен: Радуйся, красная Царева Палато; радуйся, Дево Чистая, Помощнице христианом, с любовью поющим: препетый отцев Господь и Бог благословен еси.

Песнь 8

*Ирмос: Отроки благочесті́выя в пещѣ/
Рождество́ Богородичо спасло́ есть,/ тогда́ ѹбо
образѹемое,/ ны́не же де́йствуемое,/ вселѣнную
всю воздвиза́ет пѣти Тебе́:/ Го́спода по́йте,
дела́,/ и превозноси́те Его́ во вся ве́ки.*

Возлюбил еси Христа всею крепостию твоею, достоблаженне Василие, темже смирен и кроток сердцем явился еси и, яко ревнитель заповедей Божиих, верныя научал еси взывати: Господа пойте, дела, и превозносите Его во вся веки.

Воистину смерть твоя честна пред Господом явился, ты бо, венценосче святой, от земли плотию преставився, ныне с нами духом пребываеши и подвизаеши взывати радостне: Господа пойте, дела, и превозносите Его во вся веки.

Ум наш озари, мудре Василие, да светом Трисиянным просвещаеми, прославим Пресвятую Троицу во дворех Бога нашего и вкупе с тобою вопием: Господа пойте, дела, и превозносите Его во вся веки.

Богородичен: Всесвятая Дево, Бога Слова рождшая плотию, мрак душ наших молитвами

Твоими просвети, да взываем выну: Господа пойте, дела, и превозносите Его во вся веки.

Песнь 9

*Ирмос: Всяк земнорóдный/ да възгра́ется,
Ду́хом просвеща́емь,/ да торжеству́ет же
Безплóтных умóв естество́,/ почита́ющее
свяще́нное торжество́ Богома́тере,/ и да
вопи́ет:/ ра́дуйся, Всеблаже́нная,/ Богоро́дице
Чи́стая Присноде́во.*

О, преблаженне Василие, угодниче Христов,
юроде на земли и ангелоподобниче на Небесех!
Ты, ныне мзду трудов велиих прием, у Престола
Горния Славы поминай нас, почитающих тя
сыновне.

О, молитвенниче теплый Василие! Ты,
посреде пределов земли Рязанския богоугодне
пожив и душу многими подвиги очистив, от
Владыки Христа награду небесную восприял

еси. И нам грехов прощение испроси и в добродетелех преспеяние.

О, дивне Василие, предстателю крепкий за град наш и землю Рязанскую! Моли ныне Всещедраго Владыку избавитися нам от всякого лукавства вражия, страстей и каменносердечия окаянного, да восприимем от Десницы Господа с тобою богатство некрадомое.

Богородичен: Под кров Твой, Владычице, вси земнороднии, прибегаем и вопием: Богородице, Упование наше, избави ны от безмерных прегрешений и спаси души наша.

Светилен:

Да возрадуется днесь земля Рязанская, в той бо явился светильник светлый и угодник Божий чудоточный Василий, болящих исцеляя, теснимых защищая, бесов тьму отгоняя и о чтущих его пред Богом предстательствуяй.

Слава, и ныне, Богородичен:

Богородительнице Дево, Свет душ наших,
Христа, рождшая! Во свете присносущнем
водворится всем нам испроси, воспевающим
Твое милосердие.

На хвалитех стихиры, глас 8:

Земное богатство презрел еси, святе
Василие,/ и дóма родительскаго кров отвергл
еси,/ милостию Божию покрываяся./
Странствию же Христову ревнуя,/ достигл еси
Царствия Небеснаго. (Дважды)

Миру юродив явился еси,/ премудрость
Божью людем града Рязани возвещая,/ молися,
блаженне Василие,/ да просветит Господь и
наша сердца/ молитвами твоими.

День празднственный совершаем усердно/
от земли преставления твоего, святе Василие,/
пролей ныне теплую молитву ко Господу,/ да

утвердит Отечество наше в мире и
благоденствии/ и спасет души наша.

Слава, глас тойже:

Подвиг велий на земли подъял еси/ и,
мирская мудрования отверг,/ юродив миру
явился еси,/ благодатию же Христовою
просвещен,/ суеты житейския избегати люди
поучал еси./ Не забуди и нас, праведниче
Василие, ходатайствы твоими,/ Христа
прилежно о нас умоляя.

И ныне, Богородичен, глас тойже:

Владычице, приими молитвы раб Твоих/ и
избави нас/ от всякия нужды и печали.

На Литургии

Блаженны от канона песни 3-я и 6-я.
Прокимен, глас 7: Честна пред Господем/ смерть
преподобных Его. Стих: Что воздам Господеви о
всех, яже воздаде ми? Апостол к Галатом, зачало

213. Аллилуиа, глас 6: Блажен муж, бояйся Господа, в заповедех Его восхощет зело. Стих: Сильно на земли будет семя Его. Евангелие от Луки, зачало 24. Причастен: В память вечную будет праведник, от слуха зла не убоится.

Текст службы утвержден на заседании Священного Синода 8 декабря 2020 года (журнал № 99)

